

# ‘Waspada longgar sekatan pandemik’

**WHO puji beberapa negara berjaya turunkan angka kematian**

**Geneva:** Pertubuhan Kesihatan Sedunia (WHO) menzahirkan pujian di atas penurunan angka kematian akibat COVID-19 yang dicapai beberapa negara.

Bagaimanapun, badan dunia itu mengingatkan mereka supaya terus berwaspada secara ekstrim terutama apabila perintah berkurung dan sekatan mula dilonggarkan.

Sebahagian negara Eropah dijangka mengambil masa lama untuk pembukaan semula, semenara pegawai WHO difahamkan Perancis dan Sepanyol yang mencatatkan penurunan angka kematian, akan mula melonggarkan sekatan.

Ketua Pengarah WHO, Tedros Adhanom Ghebreyesus, pada sidang media secara maya semalam, berkata kejayaan memperlakukan penularan virus adalah berita baik dan secara tidak langsung menyelamatkan banyak nyawa.

Tambah beliau, WHO juga mendapati ada negara tidak melaksanakan langkah diperlukan untuk menghentikan penyebaran virus, bagi membolehkan penduduk dengan cepat membina pertahanan badan yang dikenali sebagai imuniti berkelompok.

“Kajian serologi awal menunjukkan peratusan penduduk mempunyai antibodi rendah terhadap COVID-19, sekali gus meyakinkan kebanyakkan penduduk terdedah dan berisiko terhadap virus.



“Lebih 90 penyelidikan serologi, yang mendedahkan antibodi dalam darah menentukan sama ada seseorang mempunyai sejarah jangkitan masa lalu, menjadi kaedah pengujian di sebahagian negara sekarang,” katanya.

Sementara itu, Ketua Kecemasan WHO, Michael Ryan, menyertuji pandangan itu dan melihat penarikan berperingkat sekatan itu sebagai isyarat yang menggambarkan ‘harapan’.

“Namun tahap kewaspadaan yang ketat adalah perkara penting,” tegas beliau.

Statistik setakat semalam menunjukkan 4,271,688 orang dijangkiti COVID-19 di 212 negara dan wilayah di seluruh dunia dengan 287,613 kematian dan 1,535,093 pesakit disahkan sembuh.

Di sebalik langkah drastik dilaksanakan banyak negara untuk mengawal penularan virus itu, tetap wujud kebimbangan meluas mengenai kemunculan gelombang jangkitan kedua yang lebih besar selepas ini.

Justeru, Ryan mendesak negara terus peka meningkatkan ke siapsiagaan kesihatan awam bagi

membolehkan negara berupaya mengenal pasti kes baharu, mengesan dan mengasingkan semua kontak bagi menghindari gelombang besar kali kedua.

Ini berikutan banyak negara melakukan persiapan kemudahan kesihatan sangat sistematik terhadap kemampuan kesihatan awam sepanjang pelaksanaan sekatan, namun ada negara yang kurang bersedia.

“Sekiranya jangkitan berlanjutan di negara yang mempunyai tahap persiapan rendah tanpa kemampuan untuk menyiasat kluster atau mengenal pasti kelompok, risiko gelombang penyakit itu kembali akan ada lagi,” katanya.

Tanpa menamakan sesiapa, Ryan mendakwa ada negara bersikap tidak endah pada peringkat awal terutama dalam menangani dan mengesan kluster yang menjadi pencetus.

Ketua Teknikal Untuk COVID-19 WHO, Maria Van Kerkhove, berkata Pertubuhan Bangsa-Bangsa Bersatu (PBB) masih belum mampu membuat penilaian secara kritis terhadap laporan penyelidikan yang diterima. AFP